

Эрэсэн хамгин сэн эрдмчнрин тоод йовна

Ноябрь сарин чилгчэр Эрэсэн хамгин сэн сантехникудин мархан Челябинск балһснд болсн. Хальмгин элчнр энүнд күцэмжтәһәр орлсна туск төрәр брифинг одахн "Калмыкия" таңһчин зәңглһнә агентствд болв. "Энергосервис" АО-н специалист Руслан Малунов, ЖКХ-н болн туслмж күрглһнә халхин олна ниицәнә һардач Зинаида Павлова, сантехникуд Элдә Эрендженов болн Санал Нимгиров эн марһана тускар келж таңһчин олд зәңглһнә эв-арһсин журналистнрин сурврмудт хәрү өгв.

"Хамгин сэн сантехник Эрэсэн Кубок-2017" гидг Цугарэсэн чемпионат 3 девсңгәс тогтв. Түрүн девсңгин йовудт "Энергосервис" АО-н ул деер Элдә Эрендженов болн Санал Нимгиров Элстин школмудын сурһульчнрин телә ил кичәл давулж, мастер-класс үзүлсн. Күүкд-көвүд сантехническ кәдлмшт олзлгддг инструментсиг һартан бәрж, эдниг дураһад ю-кү кехәр седв. "Энергосервисин" элчнр эн керг-үүлдврин тускар тооца кәһад, терүнә тускар зургууд, видеоматериалмуд немәд марһаг бүрдәһачнрт йовулв. Тиигәд марһана түрүн девсңгин ашар 87 командас 50 ко-

маңд, тер тоод таңһчин элчнр дарук девснд орлцх зөв авсн болдг.

Марһана хойрдгч девсңг "Добро согревает" гидг нерәдлһтәһәр давв. Энүнә йовудт "Энергосервис" АО-н сантехникуд "Өнчн-евү бичкна Гер" гидг шаңһа шишлц үчрежденьд канализацин системин турваһинь сольв. Тер мет усна турвасиг талдан зокаста ормд үглж тәвв. Өнчн бичкдүд бәәдг үчрежденьд буйнч седклин дөң күргж, өөдән чинртәһәр кәдлмшән эдн кев. Бас эн керг-үүлн видеоматериал, зургууд, тооца кесн болдг. Тиигәд "Энергосервис" АО-н элчнр марһана 2-ч девсңгин ашар орн-нутгин Цугарэсэн чемпионатын төгсч марһанд орлцх зөв авв.

Челябинск балһснд Эрэсэн хамгин сэн сантехникуд цуглрв. Ут тоодан 20 команд чидлән сәвв. Темдгһд, орн-нутгин тооһарн оln әмтн бәәдг ик балһсдас эрдмчнр ирв. Мана таңһчас нань нег чигн келн-улсин республикин, бичкн балһсдын элчнр товчлгч марһанд орлцсн уга. Тиим болв чигн манахс ик балһсдас ирсн улсас ард хоцрлго эврә эрдминнь халхар сән медрлән, эв-арһан, чадмг-чидмгән үзүлв. Марһан хойр әңгәс тогтсн. Түрүләд эдн тео-



ретическ даалһвр күцәв, эрдминнь халхар 30 сурврт түргн кевәр удан ухаллго хәрү өгх зөвтә бәәсн. Дарук даалһврнь эннь детальмуднь цуглулж дулалһна шин оборудованиг бел кех зөвтә билә. Эльдә Эрендженов болн Санал Нимгиров эднд өгсн даалһврмудыг сәәнәр күцәж, хамгин сән 10 командын тоод орв. Эннь ик күцәмж, юңгад гихлә мана таңһчин элчнрт тиим марһанд урднь орлцсна дамшлт уга бәәсн, эдн түрүн болж орлцсн бийнь сән аш үзүлсн болжана.

Эльдә Эрендженов болн Санал Нимгиров орн-нутгин балһсдас ирсн улсга таньлдж, хоорндан дамшлтарн хувалцв. Тер мет эдн сантехникн халхд олзлгддг детальмуд кәж һарһдг заводт одснь эднд бас соньн болв. Цугарэсэн марһанд орлцсн йовдл эднд өгсн лавта, эннь эднә эрдмин чинринь өөдәнәр үнлжәхин темдг болжана. Руслан Малуновин келсәр, жил ирвәс сантехникн мергжлтн өсәд йовна. Юңгад гихлә эднд кәдлмштән шин технологийс болн өдгә цагин нехврлә ирлцжәдг оборудовань олзлх кергтә болжана.

Маргарита АРЗАЕВА